

365.9
XXII

IN NUPTIAS

VICTORI EMMANUELIS

ALLOBROGUM DUCIS REGIS DESTINATI

ET

MARIAE ADELAIDIS

AUSTRIACAE

CARMEN

THOMAE VALLAURI



TAURINI

EX OFFICINA REGIA

AN. M. DCCC. XXXII.



xxxv
1

CARMEN

Expectata veni, genus alto a sanguine regum,
Regia quam soboles mox est dictura parentem.
Expectata veni; nostras non te hymen ad oras
Advehit externam. Carae hic cunabula matris
Cernes et veterum passim monumenta virorum,
Quae persaepe parens memori tibi condidit aure.
Sponsa veni; ingeminat populi iam plausus, et aether
Insonat; augustis propera succedere tectis.
Hic tibi Maiorum occurrent ex ordine vultus.

Utrinque aurato pendentes pariete vivas
Spirantesque virum effigies lustrare licebit,
Queis accesserunt genti decora alta Sabaudae.
Adspice cui candens fecit cognomina dextra.
Humbertus, viden' est materni sanguinis auctor,
PRISCORUM ITALIAE PROGNATUS SEMINE REGUM ⁽¹⁾,
Bellica cui virtus et tot peperere triumphi
Allobrogum imperium. Hic niveae qui stemmata crucis
Ostentat ⁽²⁾, mira pietate insignis et armis,
Aspera pro Christo subiit discrimina belli;
At patriam heu! repetens, externis occidit oris.
Ille acri spectandus equo, viridique colore
Laetus ⁽³⁾ praevalidos detrusit finibus hostes.
Mox terram advectus stringit qua Bosporus undas,
Res Byzantinas adverso Marte labantes
Erigit, Augustam recreat, pacemque reducit.
Huc, sponsa, huc oculos, quaeso, nunc flecte decoros,
Horrentesque armis sublimibus adspice campos.
En iuvenem imperio tot qui regit agmina, tantum
Cui nitet ore decus, tantae sunt corpore vires.
Cernis ut invictis animis per tela per hostes
Irruit atque suos dictis hortatur in arma?

Emmanuel Philibertus is est. Non fortior alter
 Rebus in adversis, bellive sagacior. Ille
 Ut patrias sedes longinquis audiit oris
 In medio armorum versari turbine, casum
 Ingemuit gentis; tum, quae spes unica tandem
 Esset, Pictonicis ausus procedere campis,
 Rettulit insignem clara virtute triumphum.
 Victor ab hoste redux, sancito foedere iura
 Dat victis, et ovans mox patria regna recepit.
 Sed quid enim? aversa vultum cervice retorques?
 Caedisne adspectus, campique cruore madentes
 Mollem perstringunt animum? Non horrida tantum,
 Ne metuas, sponsa, occurrent spectacula Martis.
 Qui movet infestis nunc tristia funera Gallis,
 Idem victrici umbratus iam tempora lauro,
 Grata subalpinae revehit tandem otia genti;
 Doctrinae fontes aperit, « res moribus ornat,
 Legibus emendat », reddit sua rura colonis.
 Nec virtute minor comitem se Carolus addit
 Emmanuel patri, dictus cognomine magnus.
 Qui licet adsiduis aevum traduxerit armis
 Iustitiae vindex generis dum iura tuetur,

Externas vel opes ingentibus appetit ausis;
Musarum tamen hospitio laetus ⁽⁴⁾, fera bellis
Pectora permulcet. Divinae Palladis artes
Principis in gremio nutritae, ipso auspice florent;
Haud secus ac pingui felix quae innascitur agro
Arbor, cui radiis almus blanditur Apollo.
Ille, vides, qui sceptrum tenet, diademate crines
Praecinctus, fulgens, solioque insignis eburno ⁽⁵⁾,
Ille triumphatis valido conamine Gallis
Stirpis opes firmat, regumque insignia primus
Fronte gerit; dominum gaudens Ichnusa ⁽⁶⁾ veretur.
Praecipua in damnis regis stat cura levandis,
Quae gens belligera est multos perpassa per annos. ---
Panduntur musis quae olim siluere palaestrae;
Fertilitate nitent modo vasta tumultibus arva,
Et laeta adventat pleno iam copia cornu.
Proximus hic patri, sacrum qui Virginis aedem
Prospicit ⁽⁷⁾, aërii surgentem in vertice collis,
Vix rerum potitur, claris adsueta triumphis
Agmina agit, nam bella premunt; ingressus avorum
Vestigiis, redit exuviis hostilibus auctus,
Secura ut populos plaudentes pace bearet.

Inde datae leges ; hinc quam natura negavit
 Est via praeuptas ferro patefacta per alpes ;
 Artes Sardiniam invectae ; aurea tempora cuncti.
 Sed quid ego haec autem tibi nunc edissero , sponsa ?
 Quidve moror tua vota ? Quid Humbertum , aut Amedeum ,
 Aut alios memorem , ardens quos evexit ad astra
 Virtus ⁽⁸⁾ ? Maternae si nunc tibi gloria stirpis
 Sit penitus narranda , dies me voxque loquentem
 Deficiant. Sed regalis penetralia tecti
 Ingredere. Hic clarum renovat qui nomen avorum
 Adspicies. Felix quae subiacet alpibus ora
 Illius imperio paret ; veneramur eundem
 Cives virtute egregium dextraque potentem.
 Huic optata venis , proles Augusta sororis.
 Te dudum expectat sponsus , spes altera regni ,
 « Cui mens ante annos , animusque et cura virilis » ,
 Quem pietate patri similem iam fama salutat.
 O tali dignata viro , quae praemia laudum
 Grata feres ! quo te cives iam carmine dicent !
 Audisti ut laeto fremerent modo compita plausu ,
 Quum tibi regali tantum quod fulget in ore
 Conspectere decus primo vix flore iuventae.

Quid quum prole virum felix spectabis in aula
 Ludentem sobolem, referat quae blanda parentes?
 Quanta sub alpinam tangent tunc gaudia gentem!
 Scilicet egregio Caelestum pignore laeta,
 Vota Deo solvet cumulans altaria donis.

(1) Hac in re sententiam secuti sumus Ioannis Boteri (*Dei Principi christiani. Torino per Gio. Domenico Tarino, 1603, in-8.º piccolo, part. II, lib. I*), Ludovici ab Ecclesia (*Dei historia di Piemonte libri III. In Torino per Agostino Disserolio, 1603, in-4.º piccolo, lib. I*), et Ioannis Francisci Napioni (*Notizia di una carta del 1038 - Memor. dell'Accad. delle Scienze di Torino, tom. XXXI*), quam novis argumentis nuper confirmavit Aloisius Cibrarius (*V. Storia della Monarchia di Savoia, Torino 1840, tom. I, lib. I, cap. II*). Hi omnes Augustae domus Sabaudae progenitorem ferunt Humbertum I (*Biancamano*), Othonis Willelmi filium, Adalberti nepotem Italiae Regis.

(2) Amedeus III.

(3) Amedeus VI, vulgo il Conte Verde.

(4) Constat inter omnes quam benigno hospitio Carolus Emmanuel I elegantioris ingenii viros exciperet, qui tunc temporis in Italia florent. Inter quos iuvat praesertim commemorare Torquatium Tassum, Gabrielem Chiabreram, Ioannem B. Marinium, Alexandrum Tassonium et Fulvium Testium.

(5) Victorius Amedeus II.

(6) Sardiniam . . . Timaeus Sandaliotin appellat ab effigie soleae, Myrsilus Ichneusam (*ἰχνησάν*) a similitudine vestigii (*ἰχνη*). C. Plinii secundi *Historia mundi, lib. III, cap. VIII*.

(7) Carolus Emmanuel III regnum auspicatus, in summo vertice Sopergae templum dedicavit, quod bello gallico, obsessa urbe pater voverat.

(8) Nonnulli de stirpe Sabauda inter Caelites relati eximiam generis pietatem apertissime testantur.

(Descriptum ex Libro qui inscribitur: *Per le auguste nozze di S. A. R. Vittorio Emanuele Duca di Savoia, Principe ereditario, con S. A. I. R. Maria Adelaide Archiduchessa d'Austria, Omaggio della R. Università degli Studi di Torino*).

CHRONICA ANTIQVITA.





